

COSBAU FFEILIO HWYR: GWEITHREDU ADRAN 453 O'R DDEDDF CWMNIAU

YMATEB I'R YMGYNGHORI

1. Cyhoeddodd Tŷ'r Cwmniau ddogfen ymgynghori ar 13 Gorffennaf, yn gwahodd ymatebion erbyn 12 Hydref. Daeth 16 ymateb i law. Daeth rhai ymatebion oddi wrth unigolion neu gyrff yn cynrychioli cwmniau, ac eraill oddi wrth gyrff oedd â buddiant mewn darllen cyfrifon ar y cofnod cyhoeddus.

Ateb cwestiynau'r ddogfen ymgynghori

2. Cynigiai'r ddogfen nifer o newidiadau i'r drefn bresennol at gyfer Cosbau Ffeilio Hwyr. Gofynnai dri chwestiwn:
 - A fyddai'r cynnig hwn yn gwireddu nod y Llywodraeth o berswadio cwmniau i ffeilio'u cyfrifon yn brydlon?
 - A fyddai'r cynnig yn ymateb teg a chymesur i bwnc ffeilio hwyr?
 - A ddylid gweithredu ar 1 Chwefror 2009, neu ynghynt neu'n ddiweddarach.
3. Dadleuai lleiafrif o'r ymatebwyr mai camdybiaeth sylfaenol oedd holl gysyniad Cosbau Ffeilio Hwyr. Dadleuent ei fod yn faich digyfiawnhad ar gwmniau bach na ffeilient yn hwyr yn bwrpasol, ac fel y cyfryw nad oedd yn effeithiol nac yn deg a chymesur. Roedd yn dilyn nad oeddent yn derbyn cynsail y trydydd cwestiwn.
4. Teimlai mwyafrif yr ymatebwyr fod y cynnig yn deg a chymesur. Credai lleiafrif arwyddocaol nad oedd yn mynd yn ddigon pell, yn enwedig gyda golwg ar gwmniau mawr a chwmniau a ffeiliai'n hwyr iawn mewn ffordd graff. Galwai rhai ymatebwyr am gosbau uwch i gwmniau mawr, dan gyswllt efallai â'u trosiant busnes. Dadleuai eraill nad oedd y cynnig tramgwyddo mynych yn mynd yn ddigon pell ac y dylai'r gosb barhau i gael ei lluosio bob tro y ffeiliai'r cwmni'n hwyr.
5. **At ei gilydd, daethom i'r casgliad y dylai'n cynnig sefyll, gan mai dyma'r cydbwysedd gorau rhwng buddiannau cwmniau a buddiannau'r rhai sydd am ddarllen cyfrifon cwmni.**

Materion eraill a godwyd

Y Rheol Dyddiad Cyfatebol

6. Cyfeiriai sawl ymatebydd at y rheol "dyddiad cyfatebol". Ar hyn o bryd, daw cyfrifon cwmniau preifat yn ddyledus ar y "dyddiad cyfatebol" ddeg mis wedi diwedd y flwyddyn cyfleu manylion. Er enghraifft, os daw'r flwyddyn i ben ar 28 Chwefror, bydd y cyfrifon yn ddyledus ar 28 Rhagfyr, nid 31 Rhagfyr. Dyma achos dryswch mynych i gwmniau, sy'n arwain yn aml at dynnu Cosb Ffeilio Hwyr.

7. Mae'r Llywodraeth wedi penderfynu newid y gyfraith ar y pwnc hwn. Ar gyfer pob rhyw gyfrifon a gaiff eu ffeilio o dan Ddeddf Cwmnïau 2006 (mewn geiriau eraill, ar gyfer blynyddoedd yn dechrau ar neu wedi 6 Ebrill 2008), **bydd cyfrifon sydd â diwedd blwyddyn sy'n syrthio ar ddydd ola'r mis hefyd â dyddiad dyledus sy'n syrthio ar ddydd ola'r mis.** Nid yw hyn yn effeithio ar gyfrifon ar gyfer blynyddoedd sy'n dod i ben ar ganol y mis. A rhoi dwy enghraifft felly:
- Blwyddyn yn dechrau ar 1 Mai 2008. Blwyddyn yn diweddu ar 30 Ebrill 2009. Y dyddiad dyledus fydd y dyddiad cyfatebol naw mis wedyn, felly 31 Ionawr 2010; ond
 - Blwyddyn yn dechrau ar 15 Mai 2008. Blwyddyn yn diweddu ar 14 Ebrill 2009. Y dyddiad dyledus o hyd fydd 14 Ionawr 2010.

Rhyddid y Cofrestrydd i beidio â chasglu cosbau

8. Amheuai rhai ymatebwyr weithrediad rhyddid y Cofrestrydd i beidio â chasglu cosbau. Bydd y rhyddid hwn yn parhau i gael ei weithredu yn yr un ffordd o dan y Ddeddf newydd. Yng ngweithrediad rhyddid y Cofrestrydd caiff Tŷ'r Cwmnïau ei lywio gan y gyfraith achosion, sy'n ei gwneud yn glir bod rhaid i unrhyw benderfyniad i beidio â chasglu cosb fod yn eithriadol.
9. Mae'r meini prawf y bydd y Cofrestrydd yn eu dilyn wedi cael eu cyhoeddi yn llyfryn Tŷ'r Cwmnïau ar "Late Filing Penalty Appeals". Rhaid i'r cwmni ddangos i gyfres o amgylchiadau eithriadol ei atal rhag ffeilio'n brydlon. Y disgwyl yw y bydd y cwmni'n gwneud pob ymdrech rhesymol i oresgyn unrhyw anawsterau – er enghraifft, dod o hyd i ddull cyflwyno arall os oes aflonyddu ar wasanaeth arferol y post.

Cosbau Ffeilio Hwyr a chwmnïau bach

10. Dadleuai rhai ymatebwyr nad oedd yr egwyddor o gosbau ffeilio hwyr yn tycio i gwmnïau bach, gan gynnwys cwmnïau segur, elusennau a chwmnïau rheoli fflatiau. Y ddadl oedd nad oes gan y cwmnïau hyn y cronfeydd i dalu cosbau a'i bod yn ymddangos yn wrthnysig eu cosbi am beth a allasai fod yn gamgymeriad bach a achosodd i'r cyfrifon gael eu ffeilio rai diwrnodau'n hwyr.
11. Mae'r Llywodraeth yn cydymdeimlo â'r anawsterau y bydd rhai cwmnïau bach yn eu hwynebu. Holl athroniaeth y Ddeddf Cwmnïau newydd yw "meddwl yn fach yn gyntaf" - gosod fframwaith o reolau wedi'u dylunio gyda chwmnïau bach mewn cof ac y bydd cwmnïau bach yn ei chael yn hawdd eu dilyn. Ond fe erys lefel isaf o rwymedigaethau y mae'n rhaid i bob cwmni eu bodloni, pa mor fach bynnag y bônt, fel rhan o'r drefn sy'n caniatáu manteisio ar statws atebolrwydd cyfyngedig. Mae hyn yn cynnwys y rhwymedigaeth i ffeilio rhyw fath o gyfrifon. Ein barn ni yw, unwaith bod y lefel isaf bosibl hon o rwymedigaethau wedi'i gosod o dan y gyfraith, ei bod yn bwysig iddynt gael eu parchu. Cyn i Gosbau Ffeilio Hwyr gael eu cyflwyno ym 1992, roedd canran y cwmnïau a ffeiliai eu cyfrifon mewn pryd yn sylweddol is ac roedd y

Cofrestrydd ar y pryd yn wynebu beirniadaeth gyhoeddus hallt am fethu cyflawni'i gyfrifoldebau.

12. Fel y soniai un ymatebydd, bu i'r Comisiwn Ewropeaidd lansio'n ddiweddar ddogfen ymgynghori ar symleiddio cyfraith gwmnïau Ewrop. Cynigiai hon ddiffinio'r cwmnïau lleiaf yn "ficro-gwmnïau" na fyddent dan rwymedigaeth, ymhlith pethau eraill, i ffeilio cyfrifon ar y cofnod cyhoeddus. Mae'r Llywodraeth yn cefnogi'r cynnig hwn. Fodd bynnag, dim ond cynnig ydyw ar hyn o bryd ac mae rhwymedigaethau cwmnïau bach yn aros yn ddigyfnewid am y tro.

Tramgwyddwyr cyson a difrifol

13. Dadleuai rhai ymatebwyr y byddai'r cosbau uwch a arfaethid yn dal yn annigonol i ddelio â chwmnïau - yn enwedig rhai mawr - a ffeiliai'n hwyr dro ar ôl tro fel rhan o benderfyniad craff i gadw'u cyfrifon allan o'r maes cyhoeddus.
14. Gwerthfawrogwn yr ysbryd y gwnaed y sylwadau hyn ynddo. Ond ni chredwn y byddai gosod cosbau llym drwyddi draw yn iawn. Mae Tŷ'r Cwmnïau'n gweld y drefn Cosbau Ffeilio Hwyr yn gweithio ochr yn ochr â'r tramgwydd troseddol o fethu ffeilio cyfrifon, sy'n bodoli o dan Ddeddf Cwmnïau 1985 ac yn cael ei atgynhyrchu o dan Ddeddf Cwmnïau 2006. Ein hymagwedd yw erlyn mewn ffordd amcanus y cyfarwyddwyr hynny y bydd eu cwmnïau'n ffeilio'n hwyr iawn neu'n gyson hwyr. Yn ystod 2006-07, bu inni lansio 3,828 o erlyniadau, gan sicrhau 1,797 o euogfarnau. Mae gan y llys hefyd y pŵer i wahardd cyfarwyddwr sy'n anufuddhau'n gyson i'w rwymedigaethau ffeilio o dan y Ddeddf Cwmnïau.

Camau Nesaf

15. Mae'r Llywodraeth wedi rhoi rheoliadau drafft gerbron y Senedd i wneud y newidiadau angenrheidiol i'r drefn Cosbau Ffeilio Hwyr – Rheoliadau Cwmnïau (Cosbau Ffeilio Hwyr) a Phartneriaethau Atebolrwydd Cyfyngedig (Cyfnodau Ffeilio a Chosbau Ffeilio Hwyr) 2008. Bydd y rheoliadau hefyd yn cysoni cyfnod ffeilio statudol Partneriaethau Atebolrwydd Cyfyngedig â chyfnod ffeilio cwmnïau cyfyngedig. Mae'r rheoliadau i'w gweld ar wefan y Swyddfa Gwybodaeth Sector Cyhoeddus (<http://www.opsi.gov.uk/si/dsi27-12>)